

陽武縣志卷之五

山川志

記曰地秉陰竅於山形勝矧嶽視三

公瀆視諸侯王者之望祀不廢乎河瀆廟著在邑
祀典久矣若濟水詳見水經註沁河故道猶有存
者其外則一望平疇求卷石而不可得然間有地
勢巖然成阜者土人以山岡呼之亦沿其舊而勿

畧云志山川

黑洋山

在縣西北二十里平巒側登不時烟霧晦冥
昔沒於河至今岸邊猶隱有山脚

凹腰岡

在縣東北三十里以岡形中低故名又名土山

脾沙岡

在縣東南三十里形似脾故名今没于河

方古阜

在縣東北四里

單古阜

在縣東南三十里

黑古阜

在縣東南十五里

中嶽

在縣西北二十里

黃河

禹貢導河積石至于大伾則河之下孟津而達黎陽

也實由邑北陲云唐宋以來遷徙無常其見于前

史者不勝書明嘉靖間始徙縣南去城僅十五里
兩岸皆本縣境每逢霖雨暴漲砥柱三門建瓴而
下廬舍地畝歲遭湮沒而修築捍禦之勞胼胝無
寧日且檣梢麻艸費孔百出真有醫瘡剜肉之嘆
焉

其開濬淤塞變遷
事實見河防志

濟水

水經曰濟水又東北流南濟也逕陽武縣故城南注
云王莽更名之曰陽桓又東爲白馬淵淵東西二
里南北一百五十步泉流名爲白溝經謂清水又

東白溝水注之者也清溝水又東逕房城北穆天子傳曰天子埋甫田之路東至于房疑卽斯城郭注以爲趙郡房子非矣清溝水又東北逕沈清疑卽博浪亭也服虔曰博浪陽武二水沙名也張子房爲報韓仇以金錐擊秦始皇中其副車于此按房城之名恐因是設未必在秦前也水經注云濟水又東南流入陽武縣北歷長城東南流浪蕩渠出焉按竹書梁惠王十二年鄭龍賈率師築長城浪宕渠卽汴河之別名也後漢張昉爲陽武令上

言河決日久屢毀濬渠宜急修隄防以安百姓至
今賴之因立祠祀焉

沁河

按沁河舊自武陟縣東流而下經縣南大堤北卽其
故渠也河干立有石碑不知何年治河者築堰于
武陟之木欒店截入黃河其渠皆變爲桑田百年
前訛言濬此河父老悉其勞民也夜瘞其碑云

附潭三

盧家潭

在縣南任家庄前去縣四里廣長約有二頃
內產魚蟹網罟間有及之崇貞四年河溢出

至今未乾

申家潭 在縣東二十里康熙六十年河決馬營口出

雁李家潭

在縣東二十五里廣長十數頃魚蟹菱芡叢殖其中康熙六十年河決出

論曰山川爲國之紀綱禹貢特詳之一以謹阨要一

以資灌溉非僅供登臨暢遊譏也陽武山無名勝

水惟黃河似無可紀述者然四履平壤悉可桑麻

禮曰修其教不易其俗齊其政不易其宜豈必泰

山巖巖方表其瞻也哉

古蹟志

人閱人而成今古代相逝也而有不逝者存存者何蹟也人苟不能爲千百世所榮哀故老無傳遺踪莫考則亦等諸草木之腐而已其欲曠世相感憑弔流連不誠難哉陽武之博浪沙夫人而知之矣其餘如越石戶牖武疆桑園等蹟猶未湮沒也好古之士攷蹟于斯殆亦俯仰悲懷低回而不能去歟志古蹟

博浪沙

在縣東南三里父老相傳景曦門內韓人張良募力士擊秦始皇誤中副車處

留侯里

張子房擊秦故名

越石

劉琨屯軍於此故名

庫上里

乃戶牖鄉在縣東北二十里卽漢陳孺子宰內地事載蔡邕社銘

文侯鄉

在縣西北二十里漢丞相張蒼故里土人呼張大夫寨侯會爲漢御史大夫

古延州

在縣東北二十五里金置今廢爲鎮

官渡

在縣東南十里漢末袁紹與曹操相拒處

圍城

在縣東南二十里俗呼爲新城卽曹操與袁紹對敵築城屯兵以拒處以上俱有名人題

咏見藝文

地城

在縣西北五里蓋棣城之訛相傳爲古縣治今遺址猶有顯者春秋傳楚伐陳諸侯會于

棣城以救

之是疾

武疆城

在縣東北三十里史記漢兵下陽武先攻破武疆卽此

桑園

漢曹大家止宿處接文選曹昭東征賦云宿陽武之桑間卽其地也

顧王廟

舊志曰顧王本故王乃高麗王奉金生約束侵宋故於此

附形勝八景

舊志謂太行崔巍黃河縈繞按此二語自野王東以

至酸棗數百里州縣通用之辭也似不宜混稱凡

言景者諸如八峰八水六橋四明奇花怪石種種

可紀名勝以供遊人登臨賦詩之謂也舊志八景

如秋風夏懣春翠晚照何處無之不過好事強爲

附會宜刪之

論曰名山勝水昔人之所托以自見也然苟非其人
率皆當時則顯沒則已焉夫惟賢人君子爲古今
所推重偶一審跡稱說弗衰如沙中之擊甌上之
宰並垂不朽人以地傳乎亦地以人傳而已

風俗志

職方氏載豫州穀宜五種畜宜五馴民多女少男
盧舜臣謂其俗儂其政宜忠則陽邑之麗豫也亦
慨可見矣舊志云民勤稼穡而鮮詞訟似也又云

棄本業逐末務殊不知陽民不習梯航有老死不
輕棄其鄉者所稱富厚大率起家于農務本重穡
而致然也第積習之久不無有漸于沃土易淫之
語舉凡婚姻喪祭務爲美觀白賁之風蕩然矣是
不無望于在上之移易者志風俗

四禮

冠禮

男子十五至二十皆可冠旬日前家廟筮日筮賓至
期行禮拜賓至行盥洗初加賓祝曰令月吉日始

加元服棄爾幼志慎爾成德壽考維祺介爾景福
再加賓祝曰吉月令辰乃申爾服恭爾威儀淑慎
爾德眉壽萬年永受綏祿三加賓祝曰以歲之正
以月之令咸加爾服兄弟具在以成厥性黃耇無
疆受天之慶加畢受醴賓祝曰甘醴維厚嘉薦令
芳拜受祭之以定爾祥承天之休壽考不忘饌鋪
皆畢賓進冠者字之交禮乃見父兄及親友及鄉
先生賓退主人以冠者見于祠堂告拜而出禮文
如此今陽人從簡不行久矣

婚禮

凡男年十六女年十四以上並聽婚娶先遣媒通言
女氏許之然後擇期會親卽寓請期親迎入門行
交拜禮次日拜見公姑卽引見祖禰三日婿偕婦
至翁家名曰回門卽婿見婦父母之禮也雖有品
官庶民之不同其相習大概如此

喪禮

喪禮曰初終曰小斂曰大斂曰成服曰弔奠曰擇地
祭后十日葬曰小祥曰大祥士大夫之家皆遵用

之否則爲知禮者所譏笑其餘庶民亦從簡便而已
士庶中有合姻親朋友十數人爲一會者立
會長司正各一人每月輪流會茶或會酒食每人
出會金若干付會長收貯因母得子置買棚帳器
皿遇事送喪主使用外有助金若干且群効奔走
焉

祭禮

祭禮奉高曾祖禰于一室而以四仲月祭之禮也然
惟品官間一行之若士庶惟從祠但俗節薦饗

而已至于小祥必祭大祥必祭忌日必祭展墓必祭此則闔邑所通行者也

歲時節序

迎春塑春牛芒神立春前一日土人扮故事鄉民携田具唱農歌爲興東作之狀名曰演春

正月

元旦日夜半卽起櫛沐盥嗽陳牲醴具香燭紙錢祝天地神祇祭祠堂張門神放爆竹各整服投刺互拜曰拜年一切米麵肉菜必預爲之備戶外有呼

輒不應以呼者鬼也啖麵糕馬齒菜取年年糕借
齒音爲時新年好時來也家家設几圍箔以松竹
虔奉真宰神牌謂之天地棚過十七乃撤

上元

自十四至十六日競張鰲山燈豎火樹以慶賀太平
十四日日試燈十五日曰正燈十六日日散燈凡
士女出行必擇高而登焉謂免腰疼又有以艾灸
者謂曰灸百病有豎鞦韆爲戲者

十九日

是日也名曰添倉農人積粟之處燃燈設祭以祈豐
穰有女歸寧者多於是日送至去家

二月

朔二日無論士庶多以黍麵爲糕用香油煎而食之
謂曰避毒虫

三月

清明節男婦拜掃墳墓提壺挈榼焚掛紙錢恬熙載
道新娶婦行拜墳墓禮葬已過三年者益土邱壠
而高大之祭罷而哭婦女十八九焉又有攀折柳